

四庫全書

集部

欽定四庫全書

蘇詩補註卷四十八 翰林院編修查慎行撰

古今體詩九十二首

黃州春日雜書四絕

楚鄉春冷早梅天  
柳色波光已鬪妍  
淮上鴈行皆北嚮  
可無消息到儂邊

中州臘盡春猶淺  
只有梅花最可憐  
坐遣牡丹成俗物  
豐肌弱骨不成妍

清曉披衣尋杖藜  
隔牆已見最繁枝  
老人無計酬清麗  
夜就寒光讀楚辭

病腹難堪七椀茶  
曉窗睡起日西斜  
貧無隙地栽桃李  
日日門前看賣花

晚遊城西開善院泛舟暮歸二首

晚照餘喬木前村起  
夕煙暮聲虛閣上  
酒味早霜前遠  
謫何須恨來遊不偶然  
風光類吾土乃是蜀江邊

開善院

失考

放船江瀨淺城郭近連村水檻松筠靜市橋燈火繁誰  
家掛魚網小舫繫柴門卜築計未定何妨試買園

和人雪晴書事

消盡瓊瑤雲馭歸餘寒猶復助風威垂簾漸學秋霖滴  
滿地猶疑夜月輝凍壤相和開葦戶流澌半濕擁苔磯  
可憐烏鵲饑無食日暮空林何所依

奉酬仲閔食新麪湯餅仍聞糴麥甚盛因以戲之  
初見煌煌秀兩歧俄驚落磴雪霏霏可煩都尉熱承汗

絕勝臨淄貧易衣尚有清才對風月未妨便腹貯書詩  
知君貨殖誇長袖滿糴千箱待一饑

仲閔

失考

都尉承汗

三國魏志何晏傳注晏字平叔以尚主賜爵為列侯齊職儀云何晏

以主婿拜駙馬都尉世說何平叔面  
白帝疑傳粉試以湯餅汗出皎然

臨淄易衣

唐書  
玄宗

皇后王氏下邳人帝為臨淄王聘為妃立為皇后  
以愛弛不自安承間泣曰陛下獨不念阿忠脫紫半  
臂易斗麪為生日湯餅耶  
阿忠后呼其父仁皎云

讀仲閔詩卷因成長句

喜見西風吹麥秋年年為道老農憂沾塗手足經年種

薦載珠璣一倍收  
壯齒君能親稼穡  
異時我亦困耒耜  
獨憐紫竹堂前月  
清夜娟娟照客愁

送酒與崔誠老

雪堂居士醉方熟  
玉澗山人冷不眠  
送與安州潑

一作撥

醅酒從今三日是三年

崔誠老

名閑號玉澗道人工于琴詳見本集四十八卷醉翁操序中

慎按外集先生自書此詩首云夜來一笑之歡豈可多得今日雪堂得無少寂寞耶安州玉泉一酌果子少許夜琴一弄誰與同者莫是木上座否小詩漫往云云

與郭生游寒溪主簿吳亮置酒郭生喜作挽歌酒  
酣發聲坐為淒然郭生言吾恨無佳詞因為畧改  
樂天寒食詩歌之坐客有泣者其詞曰

烏啼鵲噪昏喬木清明寒食誰家哭風吹曠野紙錢飛  
古墓纍纍春草綠棠梨花映白楊路盡是死生離別處  
冥漠重泉哭不聞蕭蕭暮雨人歸去

慎按白居易寒食野望吟起句云丘墟郭門外寒食  
誰家哭先生所改止此二句又白楊路樂天詩作白  
楊樹餘  
皆同

戲作切語竹詩

隱約安幽奧，蕭騷雪數西。  
交加工結構，茂密渺冥迷。  
引葉油雲遠，攢叢聚族齊。  
奔鞭迸壁背，脫籜吐天梯。  
烟篠散孫息，高竿拱桶枅。  
漏闌零露落，庭度獨蜩啼。  
掃洗修纖筍，窺看詰曲溪。  
玲瓏孫

此字疑誤醺醺邂逅盍閒攜

切語

注詳惠州卷中和程正輔一字詩下

山行見月四言

吟哦傲兀仰晤常月，邁歛迎崖銀利玉。噉源魚鯨喁岸



雁鴛鴦卧玩我語聲牙发業

慎按黃州春日四絕以下共十三首諸刻本  
不載據外集編第六卷皆謫居黃州時所作  
今采錄

憶黃州梅花五絕

邾城山下梅花樹臘月江風好在無  
爭似姑山尋綽約  
四時常見雪肌膚

邾城

水經注江水又東逕邾縣故城南楚宣王滅邾  
徙城於此太平寰宇記邾城去州西北百二十

里臨江與武昌相對吳使陸遜攻邾城常以三萬兵  
守之晉宋西陽郡國齊齊安郡皆設于此北齊天保  
六年于舊邾城西南面別築小城置  
衡州至隋始廢以齊安郡置黃州

一枝價重萬瓊琚直恐姑山雪不如盡愛丹鉛競時好  
不知風雪養天姝

雖老于梅心未衰今朝誰贈楚江枝旋傾尊酒臨清影  
正是吳姬一笑時

不用相催已白頭一生判却見花羞揚州何遜吟情苦  
不枉清香與破愁

玉琢青枝蕊綴金仙肌不怕苦寒侵淮陽城裏娟娟月  
樊口江邊耿耿參

訪散老不遇

君來不遇我我到不逢君古殿依修柏寒花對暮雲

散老

失考

慎按以上六首諸刻本不載外集編第六卷

離黃州以後未赴登州以前所作今采錄

和王定國

離歌添唧唧古曲擬行行不作相隨燕空吟久住鶯嚶  
騰君上馬寂莫我回城明日東門外空舟獨自橫

唧唧

古樂府木蘭詩唧唧復唧唧木蘭當戶織

行行

古詩行行重行行與君生別離

試院觀伯時畫馬絕句

竹頭搶地風不舉文書堆案睡自語看馬欲驥頓風塵  
亦思歸家洗袍袴

慎按此詩見本集雜記中又見山谷集題云  
題伯時畫頓塵馬姑存俟考

出局偶書

急景歸來早窮陰晚不開傾杯不能飲留待卯君來

慎按外集先生自題此詩後云今日局中出早陰晦欲雪而子由在戶部晚出作詩數語忽憶十年前在彭城時王定國相過留十餘日還南都子由在宋幕定國臨去求家書僕醉不能作獨書一絕與之有憑君寄與卯君看之句卯君子由小字今日情味雖差勝彭城然不若歸林下夜雨對床乃為樂耳

覓俞俊筆

筆工近歲說吳俞李葛虛名總不如雖是玉堂揮翰手  
自憐白首尚抄書

筆工吳俞

按外集先生雜題云廣陵人吳政已亡其子說作筆頗得家法俞即俊也

李葛

李亦筆工姓其名失考葛宣城諸葛氏也

鼠須筆

太倉失陳紅狡穴得餘鼠既興丞相嘆又發廷尉怒磔肉飼饑猫分髯雜霜兔插架刀槩健落紙龍蛇驚物理未易詰時來即所遇穿墉何卑微託此得佳譽

慎按此詩亦載宋文鑑以為叔黨作斜川集不傳今據外集第七卷先生自登州還朝後

作姑存之

琴枕

高情閒處任君彈幽夢來時與子眠  
彭澤漫知聲上趣邯鄲深得枕中僊  
試尋玉軫拋何處閒喚香雲在那邊  
平素不須煩按抑秦娥自解語如絃

慎按外集所載琴枕詩本二首其五古一首  
已從施氏補注上卷移編第四十三卷中此  
首諸刻本皆失載今從別集采出

書李宗晟水簾圖

宗晟一軸水簾圖寄與南舒李大夫倘向林泉歸得去  
炎天酷日且令無

李宗晟

夏文彥圖繪寶鑑李宗晟鄜時人工畫山水  
寒林學李成破墨取象幽奇林麓江皋尤為

盡善評者謂  
得成之似

書龍馬圖

先皇御馬三千匹仗下曾騎玉駱驄金鼎丹成龍亦化  
圉人空棧泣西風



慎按自答王定國以下至此八首諸刻本俱  
不載外集編第七卷自登州還朝後作今采  
錄

和錢四穆父寄其弟和

老來日月似車輪此去知逢幾過春  
昨夜冰花猶作柱  
曉來梅子已生仁

慎按先生倅杭時有次韻此題詩一首已編  
第三十一卷中此詩亦同時所作王氏本載

注中今采出

皎然禪師贈吳憑處士詩云世人不知心是道只  
言道在西方妙還如瞽者望長安長安在東向西  
笑東坡居士代答云

寒時便具熱時風饑漢那知食藥功莫怪禪師向西笑  
緣師身在長安東

燈花一首贈王十六

金粟釵頭次第多起看缺月帶斜河懸知瑞草橋邊夜

笑指燈花說老坡

瑞草橋

蜀人王慶源所居注見第三十卷慶源王文詩下

慎按以上三首諸刻本俱不載據外集編第

八卷守杭州時作今采錄

王晉卿得破墨三昧又嘗聞祖師第一義故畫邢和璞房次律論前生圖以寄其高趣東坡居士既作破琴詩以記異夢矣復說偈云

前夢後夢真是一彼幻此幻非有二正好長松水石間

更憶前生後

一作復

生事

和芝上人竹軒

洞外復空中  
千千萬萬同勞師  
唱竹頌知是阿誰風

芝上人

即曇秀  
注見前

戲贈秀老

拆却相公庵泥却  
駙馬竹天下人總知  
流入傳燈錄

和晁美叔老兄

反觀皆自直  
相詆竟誰諛  
事過始堪笑  
夢中今了無  
珍

材尚空谷瘦馬正長途未識造物意茫然同一爐

公自注珍

材空谷以況老兄在  
閒郡瘦馬自謂也

晁美叔

公之同年  
注見前

慎按以上四首諸刻本俱不載外集編第八

卷守揚州時作今據此采錄

元祐九年立春

熊白來山北豬紅削劍南春盤得青韭臘酒寄黃柑

慎按以上一首諸刻本不載據外集編第九

卷中守定州時作今采錄

日夕山中忽然有懷

久卧名山雲遂為名山客山深雲更好賞弄終日夕月  
銜樓間峯泉漱階下石素心自此得真趣非外惜鶩啼  
桂方秋風滅籟歸寂緬思洪厓術欲往滄海隔雲車來  
何遲撫几空嘆息

暮歸

牛羊下已久寂寞掩柴扉水鶴鳴城堞飛螢上戟衣夜

涼江海近天濶斗牛微何日招舟子寒江北渡歸

待旦

夢破山谷冷扶桑未放曉披衣坐虛堂缺月猶皎皎揚  
泉激寒冽激齒冰雪繞百體善堅壯萬象覺清悄簪履  
事朝謁神魂飛宵渺龕燈蚌珠剖爐穗玉繩裊浮念恍  
已消真庭諒非杳須臾霽霞起赫奕射林表高樹引涼  
蟬深枝啁棲鳥二蟲彼何為逐動自紛擾悠悠天宇內  
豈復論大小覆盎舞醯雞濃昏恣飛繞定知達觀士方

寸常了了世無陶靖節此樂知者少

慎按以上三首諸刻本不載據外集編第九

卷在惠州作今采錄

約吳遠游與姜君弼喫葷饅頭

天下風流筍餅餛人間濟楚葷饅頭事須莫與繆漢喫  
送與麻田吳遠遊

除夜訪子野食燒芋戲作

松風溜溜作春寒伴我饑腸響夜闌牛糞火中燒芋子



山人更喫懶殘殘

慎按以上二首諸刻本不載據外集編第十

卷在海南作今采錄

北歸度嶺寄子由

青松盈尺間香梅盡是先生去後栽應笑來時無一物  
手攜拄杖却空回

鳴泉思思君子也君子抱道且殆而時弗與民咸  
思之鳴泉故基堙圯殆盡眉山蘇軾搔首踟躕作

鳴泉思以思之

鳴泉鳴泉經雲而潺湲拔為毛骨者修竹蒸為雲氣者  
霏烟山變莫能隱其怪野翟詎敢藏其奸茅廬肅肅昔  
有人焉其高如山其清如泉其心金與玉其道砥與絃  
執德沒世落月入地英名皎然陽曦麗天舊隱寂寂新  
篁娟娟思彼君子我心如懸谷鳥在上巖花炫前鳴泉  
鳴泉使我菀結而華顛

慎按以上二首諸刻本不載外集編第十卷

北歸時作今采錄

豐年有高廩詩

頌聲歌盛旦多黍樂豐年近見藏高廩遙知熟大田在  
疇紛已獲如阜隱相連魯史詳而記神倉賦且全春人  
洪蓄積祖廟享恭虔聖后憂農切宜哉報自天

慎按此首諸刻本不載今從外集第十卷采  
錄

萬菊軒

一軒高為黃花設富擬人間萬石君佳本盡從方外得  
異香多在月中聞引泉北澗分清露開逕南山破白雲  
此意欲為知者道陶翁猶自未離羣

萬菊軒

武林梵志萬松嶺畔有報恩寺唐  
元和中建寺內有沆雲池萬菊軒

慎按此詩載咸淳臨安志武林梵志皆以為  
東坡作今采錄

韓幹馬

少陵翰墨無形畫韓幹丹青不語詩此畫此詩今已矣

人間駑驥漫爭馳

慎按此詩見趙德麟侯鯖錄今采出

送煮菜

一本無此三字

贈包安靜先生

野菜此出珍又珍送與西鄰病酒人便須起來和熱喫  
不消洗面裹頭巾

沿流館中得二絕句

淮西功德冠吾唐吏部文章日月光千載斷碑人膾炙  
不知世有段文昌

李白當年流夜郎中原無復漢文章納官贖罪人何在  
壯士悲歌淚萬行

慎按以上二首見苕溪漁隱叢話云東坡自  
云紹聖間余得二詩于沿溪館中不知何人  
作也今錄之以益篋笥之藏或云此詩乃東  
坡竄海外時作蓋自況也不知其果然否費  
衮梁溪漫志亦云東坡在翰林承旨作上清  
儲祥宮碑哲宗親書其額紹聖黨禍起磨去

坡文命蔡元長別撰玉局遺文中有詩淮西  
功德冠吾唐云云此詩乃東坡自作蓋寓意  
儲祥事特避禍故託以得之沿流館中味其  
句法可知矣庚溪詩話云後見韓无咎云是  
江子我詩今錄存俟考

夢中賦裙帶

百疊猗猗風皺六銖縱縱雲輕植立含風廣殿微聞環  
珮搖聲

慎按右六言一首見茗溪漁隱叢話東坡云  
軾倅武林日夢上召入禁中宮女圍侍一紅  
衣女童捧紅靴一雙命軾銘之覺而記其一  
聯云寒女之絲銖積寸累天步所臨雲蒸霧  
起既畢進御上極嘆其敏使宮女送出睇視  
裙帶間有六言詩一首云云又云軾自蜀應  
舉京師道過華清宮夢明皇命賦太真裙帶  
詩乃前六言詩也覺而記之今書贈柯山潘



大臨邠老云云本集又云予在黃州時夢神  
考召入小殿賜宴令作宮女裙銘云云三說  
不同因詩並錄以備考

王定國自彭城往南都時子由在宋幕求家書僕  
醉不能作獨以一絕句與之

王郎西去路漫漫野店無人霜月寒  
汨盡粉箋書不得  
憑君送與邠君看

宋幕

潁濱遺老傳張文定知  
睢陽以學官見辟從之

慎按此詩見大全集中先生知徐州時作諸  
刻本失載今采錄

司命宮楊道士息軒

無事此靜坐一日似兩日若活七十年便是百四十黃  
金幾時成白髮日夜出開眼三千秋速如駒過隙是故  
東坡老貴汝一念息時來登此軒目送過海席家山歸  
未能一作題詩寄屋壁

慎按茗溪漁隱叢話云東坡云無事此靜坐

便覺一日似兩日若能處置此生常似今日  
年至七十便是百四十歲人世間何藥能有  
此效此方人人收得但苦無好湯使多嚙不  
下坡題息軒詩云云正此意也曹能始名勝  
志云息軒在儋州城南朝天宮中此詩諸刻  
本不載今采錄

贈黃州官妓

東坡五載黃州住何事無言及李宜却似西川

一作杜城南

工部海棠雖好不吟詩

慎按庚溪詩話云東坡謫齊安時樂籍中有  
李宜者色藝不下他妓坡將移臨汝于飲餞  
處力請詩句坡半酣笑贈云云又按周昭禮  
清波雜志亦載此段李宜作李琪未詳孰是  
今采錄備考

六言樂語

桃源未必無杏銀鑪終須有鉛符帶豈能攔浪竊花却

解流連

慎按春渚紀聞何遜云某於揚州得先生手  
畫古樂工復作樂語桃園未必無杏云云其  
後漢隸書子瞻禹功同觀真三絕也諸刻失  
載今采錄

題領巾絕句

臨池妙墨出元常  
弄玉嬌姿笑柳娘  
吟雪要看驚太傅  
斷絃何必試中郎

慎按右一首見何遜春渚紀聞云嘉興李巨  
山錢安道尚書甥也先生嘗過安道小酌其  
女數歲以領巾乞詩公即書絕句臨池妙墨  
出元常云云諸刻不載今采錄

書裙帶絕句

任從酒滿翻香縷不願書來繫綵牋半接西湖橫綠草  
雙垂南浦拂紅蓮

慎按右一首亦見春渚紀聞云嘗于陶安世

家見東坡為劉庚年君佐小女裙帶上作散  
隸書絕句任從酒滿翻香縷云云諸刻失載  
今采錄

虎跑泉

金沙泉湧雪濤香灑作醍醐大地涼解妬九天河影白  
遙通百谷海聲長僧來汲月歸靈石人到尋源宿上方  
更續茶經校奇品山瓢留待羽僊嘗

慎按右一首見曹學佺名勝志先生倅杭時

有病中游祖塔院七言律詩子由和詩凡二  
章先生原唱亦應有二諸刻本止存一首名  
勝志載此篇在鳳翔大像寺條下因其地亦  
有虎跑泉也今采錄

端硯詩

披雲離北巖度嶺入中夏重籍剪楚茅方函斷英檟騷  
壇意莫逆匠石語

少一字

夸匪堊勞運斤如帶防毀鏹礪

少四字觀隅整同厦津津剖馬肝索索模羊鮓氣逼松滋



豪姻聯雪濤姪登堂却蹢躅飲水何甜閒守墨面宜黔  
含貞口終啞靜惟有壽焉玷尚可磨也魯史記獲麟晉  
帖題裏鮓供給到唐文護持等商竿眉形空愛纖風宇  
仍嫌哆載觀七八評咸本六一寫退然敢摩肩信矣俱  
出跨始知尹公他不媚王孫賈銘詩與器傳篆刻當碑  
打嚴韻拾子遺微才任聊且

後注云端硯聯句既成暮  
歸復拾餘韻別賦一首附

後錄卷

慎按右一首載卞氏式古堂書畫彙考第十

卷云此詩東坡作行草書宋楮本小橫卷按  
後注云云則先生當別有端硯聯句今刻本  
俱無此首之真贋未可知也姑存備考

張無盡過黃州徐君猷為守有四侍人姓為孫姜  
閻齊適張夫人攜其一往婿家既暮復還乃閻姬  
也最為徐所寵因書絕句云

玉筍纖纖揭繡簾一心偷看綠羅尖使君三尺毬頭帽  
須信從來只有簷

慎按右一首從春渚紀聞采出諸刻本不載

銅陵縣陳公園雙池二首

南北山光照綠蘿濯纓洗耳不須多  
天空月滿宜登眺看取青銅兩處磨

銅陵

元和郡縣志梁南陵縣地後廢為治屬池州

陳公園

名勝志銅陵縣東北隅有陳公

園園內有雙池蘇

子瞻黃魯直常游

落帆重到古銅官長是江風阻往還  
要使謫僊迴舞袖

千年醉拂五松山

銅官

太平寰宇記銅官山在銅陵縣十里又名利國山泉源冬夏不竭可以浸鐵煮銅即唐置冶處

五松山

輿地紀勝五松山在銅官西南舊有松一本五枝翠色叅天李太白詩我來五松下置酒

窮躋攀

慎按右二首見池陽後集諸刻本不載今采

錄

咏檳榔

異味誰栽向海濱  
亭亭直幹亂枝分  
開花樹杪翻青穉  
結子苞中皺錦紋  
可療饑懷香自吐  
能消瘴癘暖如薰

堆盤何物堪為偶，萋葉清新卷翠雲。

慎按此詩語太淺直，似非先生作。曹能始名。

勝志載之姑采錄。

正月八日招王子高飲

屋雪號風苦戰貧，紙牕迎日稍知春。  
正如簷蔔林中坐，更對芙蓉城裏人。  
昨想玉堂空冷徹，誰分銀榼送清醇。  
海山知有東南角，正看歸鴻作小顰。

王子高

注見本集笑  
蓉城詩下

慎按右一首諸刻不載見于蒲積中歲時雜  
咏今集中今采錄

醉中題鮫綃詩

天地雖虛廓惟海為最大聖王皆祀事位尊河伯拜祝  
融為異號恍惚聚百怪二氣變流光萬里風雲快靈旗  
搖虹燄赤虬噴滂湃家近玉皇樓彤光照世界若得明  
月珠可償逐客債

慎按右一首諸刻不載苕溪漁隱叢話引仇

池筆記云余一日醉卧有魚頭鬼身者自海中來云廣利王請端明余被髮草履黃冠而去亦不知身步入水中但聞風雷聲有頃豁然明白真所謂水晶宮殿也其下驪目夜光文犀尺璧南金火齊不可迎視珊瑚琥珀不知幾多也廣利王佩劍冠服而出從二青衣余曰海上逐客重煩邀命有頃東華真人南溟夫人造焉出鮫綃文餘命題詩余賦曰天

地雖虛廓云云寫竟進廣利諸仙迎看咸稱  
妙獨廣利旁一冠簪者謂之鼈相公進言蘇  
軾不避諱忌祝融字犯王諱王大怒余退而  
嘆曰到處被鼈相公廝壞茗溪漁隱曰此事  
恍惚怪誕殆類傳奇異聞所載又其詩亦淺  
近不似東坡平日語好事者為之以誑世耳  
又按仇池筆記相傳東坡自撰此一則當在  
海外所紀時有董必者承奸相意遣人至僭



耳逐出官舍所云斃相公者蓋指董必也此  
詩聊以寓意亦非果有其事胡仔疑為好事  
者所託吾不謂然

無題

簾卷牕穿戶不扃隙塵風葉任縱橫幽人睡足誰呼覺  
歌枕床前有月明

慎按右一首見本集與黃師是尺牘云近者  
幼累舟中皆伏暑自愍一年在道路矣已決

計旦夕渡江至毘陵矣塵埃風葉滿室隨掃  
隨有然不可廢掃以為賢于不掃也有詩錄  
呈云云據此當是度嶺以後未到常州以前  
所作諸刻本俱失載今采錄

葛延之贈龜冠

南海神龜三千歲兆協朋從生慶喜智能周物不周身

未免人

詩話總龜作一

鑽七十二誰能用爾作小冠岫嶁

當作  
勾漏

耳孫勅其製君今此去寧復來欲慰相思時整視

慎按右一首見葛立方韻語陽秋第三卷云東坡在儋耳時余三從兄諱延之自江陰擔簦萬里絕海往見留一月坡嘗誨以作文之法文載全集中吾兄拜其言而書諸紳嘗以親製龜冠為獻坡受之而贈以詩南海神龜三千歲云云今集中無此詩余常見其親筆又費補之梁溪漫志云東坡在儋耳嘗為葛延之作龜冠詩葛以語胡蒼梧理詩話總龜

亦云然據此三段其為先生海外作無疑諸  
刻不載今采錄

別海南黎民表

我本海南民寄生西蜀州忽然跨海去譬如事遠游平  
生生死夢三者無劣優知君不再見欲去且少留

慎按右一首見詩話總龜引冷齋夜話云余  
游儋耳見黎民表為余言東坡無日不相從  
嘗從乞園蔬出其臨別歸海北詩我本海南

民云云其末云新釀甚佳求一具漫寫此詩  
以折菜錢諸刻不載今采錄

雅安人日次舊韻二首

人日滯留江上村定知芳草怨王孫題詩寄遠方揮翰  
扶杖登高獨出門柳色忍看成感嘆花前歸思自飛翻  
浮陽披凍雖才弄已覺春工漏一元

似聞高隱在前村坐膝扶床戲子孫自賞春光攜桂酒  
喜逢晴色款柴門屏間帶日金人活頭上迎風綵勝翻

蓬鬢扶疎吾老矣豈能舊貌改新元

慎按右二首諸刻不載見宋蒲積中所選歲  
時雜咏今集中此詩編次庚辰人日二章之  
後年譜庚辰人日先生在儋耳作七律二首  
五月聞赦六月渡海北歸明年辛巳度嶺正  
月五日過南安軍則次韻人日詩當作于此  
時但雅安地名無可考恐是南安之譌存疑  
俟考

和代器之

雨過郊原一番新  
尋芳車馬踏無塵  
普天冷食聞前古  
蕭寺清游屬兩人  
不作佳期問新歷  
頗同之問感餘春  
明年歸籍梨花上  
應會羣賢及四隣

器之

即劉安世注見  
前四十五卷

慎按右一首見歲時雜吟今集按先生北歸  
時有寒食與器之游南塔寺寂照堂七律一  
首此詩即次前韻豈器之不能詩而先生代

為和章耶諸刻不載今補錄

自題金山畫像

心似已灰之木身如不繫之舟問汝平生功業黃州惠州儋州

慎按金山志李龍眠畫子瞻照留金山寺後東坡過金山自題云云周必大乾道庚寅奏事錄亦載此詩諸本皆無今采錄

歸來引送王子立歸筠州



歸去來兮世不汝求胡不歸洵北望之橫流兮渺西顧  
之塵霏紛野馬之決驟兮幸余首之未轍出彭城而南  
驚兮眷丘隴而增歎亂清淮而俯鑒兮驚昔容之是非  
念東坡之遺老兮輕千里而款余扉共雪堂之清夜兮  
攬明月之餘輝曾難黍之未熟兮嘆空室之伊威我挽  
袖而莫留兮僕夫在門歌式微歸去來兮路渺渺其何  
極將稅駕于何許兮北江之南南江之北于此有人兮  
儼莪莪其豐碩孰居約而爾肥兮非糠覈其何食久抱

一而不試兮愈溫溫而自克吾居世之荒浪兮視昏昏  
而聽默默非之子莫振吾過兮久不見恐自賊吾欲往  
而道無由兮子何畏而不即將以彼為玉人兮以子為  
之璞也

慎按王子立名適子由之婿以元祐四年歿  
于筠州先生有詩哭之此詞在黃州時送歸  
筠作諸刻失載今從全集采錄

黃泥坂詞

出臨皋而東驚兮並麓祠而北轉走雪堂之坡陀兮歷  
黃泥之長坂大江洶以左繚兮渺雲濤之舒卷草木層  
累而右附兮蔚柯丘之葱蒨余旦往而夕還兮步徙倚  
而盤桓雖信美而不可居兮苟娛余于一盼余幼好此  
奇服兮襲前人之詭幻老更變而自哂兮悟驚俗之來  
患釋寶璐而被繒絮兮雜市人而無辨路悠悠其莫往  
來兮守一席而窮年時游步而遠覽兮路窮盡而旋反  
朝嬉黃泥之白雲兮暮宿雪堂之青烟喜魚鳥之莫余

驚兮幸樵蘇之我媿初被酒以行歌兮忽放杖而醉偃  
草為茵而塊為枕兮穆華堂之清宴紛墜露之濕衣兮  
升素月之團團感父老之呼覺兮恐牛羊之予踐于是  
蹶然而起起而歌曰月明兮星稀迎余往兮餞余歸歲  
既晏兮草木腓歸來歸來兮黃泥不可以久嬉

慎按黃泥坂在黃州以下數篇諸刻本俱不  
收入詩類先生和歸去來詞施氏原本既附  
和陶卷中此亦有韻之詞也何獨遺之故與

清溪詞上清詞三章並采錄

清溪詞

大江南兮九華西泛秋浦兮亂清溪水渺渺兮山無蹊  
路重複兮居者迷爛青紅兮粲高低松十里兮稻千畦  
山無人兮雲朝掛鵲濛濛兮淪淪嘯林谷兮號水泥  
走鼉鼉兮下鳬鷺忽孤壘兮隱重堤杳冥茫兮聞犬雞  
鬱萬瓦兮鳥翼齊浮軒楹兮飛拱枅雁南歸兮寒蛩嘶  
弄秋水兮挹玻璃朝市合兮雜髦鬣

一作倪

挾簞瓢兮佩

鋤犁鳥獸散兮相扶攜  
隱驚雷兮驚長霓  
望翠微兮古招提  
躋木杪兮翔雲梯  
若有人兮恨幽棲  
石為門兮雲為閨  
塊虛堂兮法喜妻  
呼猿狙兮子鹿麕  
我欲往兮奉杖藜  
獨長嘯兮謝阮嵇

慎按清溪在池州先生作此詞歲月莫考諸刻不載今從全集采錄

上清詞

原注以宮名名篇

君胡為乎山之幽  
顧宮殿兮久淹留  
又曷為一朝去此

而不顧兮悲此空山之人也來不可得而知兮去固不可得而訊也君之來兮天門空從千騎兮駕飛龍隸星辰兮役太歲儼晝降兮雷隆隆朝發軫兮帝庭夕弭節兮山宮懽有妖兮虐下土精為星兮氣為虹愛流血之滂沛兮又嗜瘡瘍與螟蟲嘯盲風而涕淫雨兮時又吐旱火之熾融銜帝命以下討兮建千仞之修鋒乘飛霆而追逸景兮歛晷掃滅而無蹤忽崩播其來會兮走海岳之神公龍車獸鬼不知其數兮旗纛晦靄而冥濛漸

俯偃以旅進兮鏘劍珮之相礮司殺生之必信兮知上帝之不汝容既約束以反職兮退戰慄而愈恭澤允塞于四海兮獨澹然其無功君之去兮天門開款閭闔兮朝玉臺羣僊迎兮塞雲漢儼前道兮紛後陪歷玉階兮帝迎勞君良苦兮馬虺隤閔人世兮迫隘陳下土兮帝所哀返瓊宮之嵯峨兮役萬靈之喧阗默清淨以無為兮時節狩于斗魁詣通明而獻黜陟兮軼蕩蕩其無回忽表裏之煥霍兮光下燭于九垓時游目以下覽兮五



岳為豆四溟為盃俯故宮之干柱兮若毫端之集埃來  
非以為樂兮去非以為悲謂神君之既返兮曾顏咫尺  
之不違升秘殿以內悸兮魂凜凜而上馳忽寤寐以有  
得兮敢沐浴以獻辭是耶非耶臣不得而知也

軼蕩蕩

軼疑應  
作迭

慎按宋史禮志鑄神霄九鼎奉安于上清寶  
籙宮但不詳何神及宮在何地諸刻失載今

從全集采錄

醉翁操

并引

琅邪幽谷山水奇麗泉鳴空澗若中音會醉翁喜之  
把酒臨聽輒欣然忘歸既去十餘年而好奇之士沈  
遵聞之往游焉以琴寫其聲曰醉翁操節奏疎宕而  
音指華暢知琴者以為絕倫然有其聲而無辭雖為  
作歌而與琴聲不合又依楚詞作醉翁引好事者亦  
倚其辭以製曲雖粗合均度而琴聲為辭所繩約非  
天成也後三十餘年翁既捐館舍而遵亦歿久矣有

廬山玉澗道人崔閑特妙于琴恨此曲之無詞乃譜其聲而請于東坡居士以補之云

琅然清園誰彈響空山無言惟翁醉中知其天月明風露娟娟人未眠荷蕢過山前曰有心也哉此賢醉翁嘯咏聲和流泉醉翁去後空有朝吟夜怨山有時而童顛水有時而回川思翁無歲年翁今為飛仙此意在人間試聽徽外雨三絃

慎按琴操亦古詩之流此首諸刻本不載今

從全集中采錄

次韻借觀睢陽五老圖

國老安榮心自閒紫袍金帶舊簪冠  
星騎箕箒揚糠粃斗掌權衡表漢桓  
冬有愆陽嫌薄熱夏多沴氣畏輕寒  
賴得五賢清雅出俾人敬慕肅容看

慎按右七言律詩一首見鐵網珊瑚格律句  
法全不類坡公作姑據此采錄

題金山寺回文體

潮隨暗浪雪山傾，遠浦漁舟釣月明。  
橋對寺門松逕小，檻當泉眼石波清。  
迢迢綠樹江天曉，靄靄紅霞晚日晴。  
遙望四邊雲接水，碧峯千點數鷗輕。

慎按右七言律詩一首，諸刻不載。今從魏慶之詩人玉屑第二卷采錄。

贈姜唐佐

生長茅間有異芳，風流稷下古諸姜。  
適從瓊管魚龍窟，秀出羊城翰墨場。  
滄海何曾斷地脉，白袍端合破天荒。

錦衣他日千人看始信東坡眼目

一作長

慎按此詩諸刻不載見邵氏聞見後錄云唐  
荊州每解送舉人多不成名號曰天荒至劉  
蛻以荊州解及第號破天荒東坡嘗作二句  
贈姜唐佐滄海云云用此事也題其後云待  
子及第當續後句唐佐自廣州隨解過許昌  
見潁濱時東坡已下世潁濱為足成其詩云  
云今補錄

水月寺

千尺長松掛薜蘿  
梯雲嶺上一聲歌  
湖山深秀有何處  
水月池中桂影多

慎按右一首諸刻不載今從武林梵志采錄

半月泉

附題名

蘇軾曹輔劉季孫鮑朝懋鄭嘉會蘇

固同遊元祐六年三月十一日

請得一日假來游半月泉何人施大手擘破水中天

慎按右一首諸刻不載見談鑰吳興志先生

遊德清縣題半月泉作也石刻真跡在慈相  
寺中余家有榻本按先生自杭守召還在元  
祐辛未集中有三月六日別南北山諸道人  
詩與半月泉題名相距才五日當是還朝時  
便道來游歲月鑿鑿可據而此詩本集失載  
詩與題名字體大小不同迥出兩手疑後人  
因題名而贗作此詩蓋先生時方還朝何云  
請假以此辨之其為假託未可知也存疑俟



考

游何山

今古何山是勝游  
亂峯縈轉繞滄洲  
雲含老樹明還滅  
石礙飛泉咽復流  
徧嶺烟霞迷俗客  
一溪風雨送歸舟  
自嗟塵土先衰老  
底事孤僧亦白頭

慎按右七言律詩一首諸刻不載見徐獻忠  
吳興掌故集第十卷今采錄

自題臨文與可畫竹

石室先生清興動落筆縱橫飛小鳳借君妙意寫簞簞  
留與詩人發吟諷

慎按右一首見卞氏式古堂畫考諸刻不載  
今采錄

寶墨亭

山陰不見換鵝經京口空傳瘞鶴銘瀟灑謫僊來作郡  
風流太守為開亭兩篇玉蕊塵初滌四體銀鈎迹尚青  
我久臨池無所得願觀遺法快沈冥

慎按右一首見京口三山志中劉昌縣笥瑣  
探云寶墨亭宋初建以覆瘞鶴銘者今廢又  
蘇子美滄浪集亦載此疑因姓傳訛也諸刻  
失載今補錄

雙井白龍

巖泉未入井蒙然冒沙石泉嫩石為厭石老生罅隙異  
哉寸波中露此橫海脊先生酌泉笑泉秀神龍蟄舉手  
玉筍插忽去銀釘擲大身何時布大翮翔霹靂誰言鵬

背大更覺宇宙窄

慎按冷齋夜話云南海城中有兩井相近咫尺而異味號雙井井源出巖石罅中東坡酌水異之曰吾尋白龍不見今知家此水中乎同游怪問其故曰白龍當為東坡出請徐待之俄見其脊尾如銀蛇狀忽水瀾有雲氣浮水面舉首如插玉筍乃泳而去余至二井太守張子修為造庵井上號思遠亭名洞酌崖

有怪樹樹枝之脇有詩巖泉未入井云云字  
畫如顏書無名銜年月此詩風格似東坡而  
言泉嫩石老疑學者為之也今據此采錄

瑞金東明觀

浮金最好溪南景古木樓臺畫不成天籟遠兼流水韻  
雲璈常聽步虛聲青鸞白鶴蟠空下翠草玄芝匝地生  
咫尺仙都隔塵世門前車馬任縱橫

慎按右一首見贛州舊志今采錄

題清淮樓

觀魚惠子臺蕪沒夢蝶莊生冢木秋惟有清淮供四望  
年年依舊背城流

慎按右一首諸刻不載見錦繡萬花谷濠州  
絕句中今采錄

西湖絕句

畢竟西湖六月中風光不與四時同接天蓮葉無窮碧  
映日荷花別樣紅

慎按右一首諸刻不載見錦繡萬花谷今采

錄

戲答佛印

遠公沽酒飲陶潛佛印燒猪待子瞻  
采得百花成蜜後不知辛苦為誰甜

慎按竹坡詩話云東坡喜食燒猪肉佛印住  
金山時每燒猪以待其來一日為人竊去東  
坡戲作小詩云云諸刻不載今采錄

失題三首

木落沙明秋浦雲臥

此字記

烟淡瀟湘曾學扁舟范蠡五

湖深處鳴榔

望斷水雲千里橫空一抹晴嵐不見邯鄲歸路夢中畧

到江南

公子只應見畫此中我獨知津寫到水窮天杪定非塵

土間人

慎按以上六言絕句三首諸刻不載今從晚



香堂蘇帖采錄

來鶴亭

鴻漸偏宜丹鳳南冠霞帔月影氤氲酒酣亭上來看舞  
有客新名喚作耽

慎按袁聚楓牕小牘云王大父時有埜鶴來  
棲馴狎不去蘇子瞻有詩云云聚之祖名彥  
方此詩集中不載今采錄

蘇詩補註卷四十八

欽定四庫全書

集部

蘇詩補註卷

四十九  
五十

詳校官庶吉士<sub>臣</sub>李傳熊

檢討<sub>臣</sub>何思鈞覆勘

總校官原任中允<sub>臣</sub>王燕緒

校對官中書<sub>臣</sub>王家賓

謄錄監生<sub>臣</sub>武先振

欽定四庫全書

蘇詩補註卷四十九

翰林院編修查慎行撰

古今體詩四十七首

慎按唐宋名家詩文間有互見他集者如馬

退山茅亭記載獨孤及集柳州謝表其一乃

李吉甫郴州作而皆入子厚集中大樂十二

均圖楊次公作也編于嘉祐集蠶對織婦文

宋元憲作也編于米襄陽集三先生論事錄

序陳同甫作也編于朱文公集如此之類往往有之但未有舛繆混雜幾及百篇如東坡詩之甚者也李端叔有言先生自嶺外歸所作字多他人詩文蓋紹聖以後嚴禁蘇氏之學至淳熙初禁乃弛後人得公手跡便采入公集承譌數百年注者與讀者漫不加辨凡慎所駁正非敢一毫臆斷悉從諸家文集詩話一一搜抉校對其雷同者另編二卷如單

行之什則注云此詩亦見某人集其或同時  
唱和則依和詩例附載各卷本詩之後此卷  
中但列題目云此詩附載第幾卷覽者詳之

老翁井

此詩施氏原本  
載遺詩卷首

井中老翁誤年華白沙翠石公

一作翁

之家公來無蹤去

無跡井面團團

一作圖

水生花翁今與世兩何與無事紛

紛驚牧豎改顏易服與世同母使世人知有翁

老翁井

老蘇公嘉祐集老翁泉銘序云住歲十年山  
空月明有老人偃息泉上就之則隱而入於

泉洵甃石作亭其上銘曰山起東北翼而南西涓涓  
斯泉空溢以瀾斂以爲井可飲萬夫按梅聖俞有和  
詩不  
具錄

慎按朱子晦菴詩話云老翁井詩在老蘇送  
蜀僧去塵之前必非他人作然不見于嘉祐  
集亦不省其何說也彼欲井中老翁改顏易  
服不使人知而後篇有嫌瘦廢彈之嘆何耶  
然其言怨而不怒用意亦遠矣據此則此詩  
與送蜀僧去塵二首皆老蘇公作也

送蜀僧去塵

十年讀易費膏火盡日吟詩愁肺肝不解丹青追世好  
欲將芹苴薦君盤誰為善相寧嫌瘦復一作後有知音可  
廢彈拄杖掛經須倍道故鄉春蕨已闌干

慎按茗溪漁隱引石林詩話云蘇明允詩不  
多見然精深有味語不徒發如讀易詩云誰  
為善相寧嫌瘦後有知音可廢彈婉而不迫  
哀而不傷所作自不必多也云云今合之朱

子詩話斷以為老蘇作

新城道中第二首

詩附載第九卷中

慎按新城道中二首東風知我欲山行東坡先生原作也身世悠悠我此行新城令晁端友和韻也詳方回瀛奎律髓注見第九卷

虛飄飄

第二首第三首詩俱附載三十卷中

慎按周紫芝太倉稊米集云元祐間黃山谷作虛飄飄蓋樂府之餘當時諸公皆有和詩



戊辰臘月夜讀淮海集見之亦用其韻作詩  
云云又按淮海集花飛不到地一首山谷原  
作也畫簷蛛結網一首東坡和詩也風寒吹  
絮浪一首少游和詩也今據此駁正注詳前  
題織錦圖上回文三首

詩附載二  
十一卷中

慎按本集題跋云余少時見一江南本其後  
有人題詩十餘首皆奇絕今記其三第一首  
春晚落花餘碧草云云第二首紅手素絲干

字錦云云第三首羞看一首回文錦云云以  
上三首諸刻本俱訛入先生集中今以本集  
再次前韻三首為主此三首則附于後注詳  
前

和人回文五首

紅牕小泣低聲怨永夕春寒斗帳空中酒落花飛絮亂  
曉鶯啼破夢匆匆

同誰更倚閒牕繡落日紅扉小院深東復西流分水嶺

恨兼

一本作無訛

愁續斷絃琴

寒信風飄霜葉黃  
冷燈殘月照空牀  
看君寄憶傳文錦  
字字縈愁寫斷腸

前堂畫燭夜凝淚  
半夜清香荔惹衾  
烟鎖竹枝寒宿鳥  
水沈天色霽橫參

蛾翠斂時聞燕語  
淚珠彈處見鴻歸  
多情妾似風花亂  
薄倖郎如露草晞

慎按淮海後集載此五絕句題云蘇子瞻記

江南集所題詩本不全余嘗見之記其五絕  
今以補子瞻之遺考之經籍志有江南集十  
卷不載作者姓名據此則非東坡詩可知施  
氏原本不載新刻本載續補下卷今改編

送淡公二首

燕本冰雪骨越淡蓮花風五言雙寶刀聯響高飛鴻翰  
苑錢舍人詩韻鏗雷公識本不識淡仰咏嗟無窮清韻  
生物表朗玉傾壺中常于冷竹坐相語道意沖嵩洛興

不薄稽江事難同明日若不來我作黃石翁何以兀其  
心為君學虛空

燕本

唐書賈島范陽人初為  
浮屠名無本後舉進士

越淡

未詳

坐重青草公意合滄海濱渺渺獨見水悠悠不聞人鏡  
浪洗手淥剡花入心春雖然防外觸眼前遶衣新行當  
譯文字慰此吟殷勤

慎按孟東野集送淡公詩共十一首此其二  
不知何以訛入蘇集今駁正

黃州

南山一尺雪雪盡山蒼然澗谷深自暖梅花應已繁使  
君厭騎從車馬留山前行歌招野叟共步青林間長松  
得高陰盤石堪醉眠祇樂聽山鳥攜琴寫幽泉愛之欲  
忘反但苦世俗牽歸來始覺遠明月高峯顛

慎按此詩亦見歐陽公集題云游琅邪山琅  
邪在滁州之南故稱南山歐公時知滁州故  
自稱使君山中有泉若中音會醉翁喜之每

把酒欣然忘歸時有沈遵者以琴寫其聲為  
醉翁操故又云攜琴寫幽泉此詩斷為歐公  
作無疑也

古風

精神

淮海集  
作思

洞元化白石昇高旻俯仰凌倒景龍行逸

淮海集  
作速

如神半道過紫府弭節聊逡巡金牀設寶几

璨明月珍仙者二三子眷然骨肉月親飲我霞石

淮海集  
作一

孟放孟恍

淮海集  
作懷暖

如春遂朝玉虛上冠劍班列真無端

拜失儀放棄

淮海集  
作斤

令自新雲霄難遽反下土多埃塵

淮南守天庖嗟我復

淮海集  
作實

何人

慎按抱朴子祛惑篇云河東蒲坂有項曼都

者入山學仙十年而歸家人問其故曼都曰

在山中三年精思有仙人來迎我共乘龍而

升天良久低頭視地杳杳冥冥上未有所至

而去地已絕遠龍行甚疾及到天上先過紫

府仙人以流霞一杯與我飲飲輒不饑渴忽



然思家到天帝謁拜失儀見斥來還令當更  
自修積昔淮南王劉安升天見上帝而箕坐  
大言自稱寡人遂見謫守天厨三年吾何人  
哉河東因號曼都為斥仙人云云此詩全用  
此事乃諷刺學仙之流語多荒誕與先生和  
陶山海經古強本庸妄一首畧同若出東坡  
手則語意重複矣淮海前集第四卷亦載此  
詩中間數處微有同異已附注本句下并為

辨正

游杭州山

詩附載第七卷中

慎按右五言古一首乃子由和子瞻自淨土寺步至功臣寺作也詩載樂城集第四卷中諸刻本俱訛編東坡集惟施氏原本不載新刻本載續補上卷今為駁正

無題

引手攀紅櫻紅櫻落如線

長慶集作似霰

仰首看紅

長慶集作白下同

日紅日走

長慶集  
作委

如箭年光

長慶集  
作芳

與時景頃刻互

長慶

集作  
猶

衰變何當

長慶集  
作況是

血肉身安得

長慶集  
作能

常強健人

心苦執迷富

長慶集  
作慕

貴憂貧賤憂

長慶集  
作愁

色常在眉歡

容不上面吾今

長慶集  
作況吾

頭半白把鏡非不見惟應

長慶  
集作

何必花下盃更待他人勸

慎按右一篇乃白樂天花下對酒二首之一

也施氏原本不載新刻本載續補上卷今駁

正

古意

兒童

砵溪詩話作曹

鞭笞學官府，翁憐兒癡旁。笑侮翁出坐，曹

鞭復呵賢于羣兒。能幾何？兒曹鞭人以為戲。公怒鞭人

血流

一作滿

地等為戲劇，誰復

砵溪詩話作後

先我笑謂翁兒更

賢

慎按右一首見張文潛宛丘集第十二卷有

感三首之一也。兒童張集作羣兒，鞭人以為

戲。張集作相鞭，以為戲。砵溪詩話云：張文潛

兒曹鞭笞學官府云云余謂此詩亦不可不  
令操權者知也宋文鑑選入二十二卷中亦  
以為張耒據此三段其為文潛作無疑施氏  
原本不載新刻載續補上卷今駁正

### 雷州八首

白髮坐鈎黨南遷瀕海州灌園以餬口身自雜蒼頭籬  
落秋暑中碧花蔓牽牛誰知把耒人舊日東陵侯

鈎黨

後漢書黨錮傳後張儉事起收捕鈎黨宋史秦觀傳紹聖初坐黨籍出通判杭州以增損實錄

貶監處州酒稅繼削秩徙郴州編管橫  
州又徙雷州徽宗立放還至藤州卒

荔子無幾何黃甘遽如許遷臣不惜日恣意移寒暑層

巢俯雲木信美非吾土草芳自有時鷓鴣何闕汝

惜日

韓退之有此日足可惜詩  
此反其意故云不惜日

鷓鴣

淮海集  
作鳴鴣

下居近流水小巢依嶺岑終日數椽間但聞鳥遺音爐  
香入幽夢海月明孤斟鷓鴣一枝足所恨非故林

慎按下居淮海集作卜

居嶺岑淮海集作欽岑

培塿無松柏駕言此焉游讀書與意會却掃可忘憂尺

蝮以時屈其伸亦非求得歸良不惡未歸且淹留

慎按此馬游淮海集作出焉  
游屈伸二字淮海集作詘信

粵嶺風俗殊有疾時

一作皆

勿藥束帶趨房祀用史巫紛

若絃歌薦藹栗奴至洽觴酌呻吟殊未已更把雞骨灼

慎按粵嶺淮海集作駱越房祀淮海集作祀  
房用史淮海集作替史奴至淮海集作奴主

粵女市無常所至輒成區一日三四遷處處售鰕魚青

帚脚不襪臭味猿與狙孰云風土惡白洲生綠珠

白洲

按淮海集洲作州能改齋漫錄云白州雙角山  
猶存綠珠井今有綠珠水相傳水旁間產美麗

海康臘已酉不論冬孟仲殺牛撾鼓祭城郭為傾動雖非堯頌歷自我先人用苦笑荆楚人嘉平臘雲夢

臘已酉

羅壁識遺引玉燭寶典云臘祭先祖蜡祭百神唐貞觀初丑蜡百神辰臘宗廟至開元定

禮始蜡臘同日宋依和峴之議二祭同用戌日今曰臘已酉蓋不遵宋制也

嘉平

禮記仲冬臘先

祖五祀疏云臘謂田獵所得禽祭者以欲臘祭時暫出田獵以取禽非仲冬大閱之獵也蔡邕云夏曰清祀殷曰嘉平周曰蜡秦曰臘能改齋漫錄云考史記秦惠王五十一年初臘及始皇三十一年十二月更名臘曰嘉平先是其邑歌謠曰神仙得者茅初成帝若學之臘嘉平父老具言此神仙之謠始皇欣然有尋仙之意因改臘曰嘉平則臘之名不始于秦矣按應劭風俗通引禮傳夏曰嘉平云云以是知臘祭之



名始于三代廢于始皇而興于漢也

惟勤以嘉平為夏祭與蔡邕不同

慎按傾動淮海集作沸

動苦笑淮海集作大笑

舊時日南郡野女出成羣此去尚應遠東風已如雲虫  
氓託絲布相就通殷勤可憐秋胡子不遇卓文君

慎按舊時淮海集作舊

傳東風淮海集作東門

慎按右五言古詩八首皆秦少游作也按淮

海集中有雷陽書事三首越嶺風俗殊舊時

日南郡乃其二又有海康書事十首今白髮

坐釣黨荔子無幾何下居近流水培塿無松柏  
粵女市無常海康臘已酉乃其六先生遠  
謫海外不應云南遷瀕海州其與子由相遇  
同行至雷僅留月餘一忽忽過客豈有灌園  
餬口之事且計先生過雷渡海在五六月間  
今詩中一則曰籬落秋暑中再則曰黃甘遽  
如許三則曰海康臘已酉四則曰東風已如  
雲細玩詩意皆謫居此地自夏徂秋背冬涉

春感時紀事之詞斷斷非東坡作考之宋文  
鑑第二十卷中所選海康書事五首亦以為  
秦作無疑也八章施氏原本不載新刻載續  
補上卷今為駁正

申王畫馬圖

天寶諸王愛名馬千金爭致華軒下當時不獨玉花驄  
飛電流雲絕瀟灑兩坊岐薛寧與申憑陵內廐多清新  
肉駿汗血盡龍種紫袍玉帶真天人驪山射獵包原隰

御前急詔穿圍入揚鞭一蹙破霜蹄萬騎如風不能及

雁飛兔走驚絃開翠華按轡從天回五家錦繡變一作編

山谷百里舄珥遺纖一作塵埃青驪蜀棧兩超忽一作西趨急

高準濃娥散荆棘回首追風趁日飛一本作首猶連天鳥自飛五陵

佳氣秋一作春蕭瑟

天寶諸王按舊唐書睿宗六子其一早卒寶后生明皇劉后生讓皇帝憲即寧王也官人柳氏

生申王撫崔孺人生岐王範王德妃生薛王業初出閣列第于東都積善坊號五王宅洪容齋謂明皇兄弟五人岐薛申寧而外又有邠王守禮而舊唐書不載今考之寧王申王兄也岐王薛王弟也與明皇而

為五故當時目明皇為三郎申王薨于開元十二年  
岐王薨于十四年薛王薨于二十二年惟寧王稍後  
然亦歿于二十九年天寶改元以後諸王無一存者  
此詩起句云天寶諸王乃一時落筆之訛又王氏舊  
注謂岐薛申寧皆明五陵班孟堅賦南望杜霸北眺  
五陵李善注高帝長陵惠  
皇帝安陵文帝霸陵景帝陽陵昭帝平陵宣帝杜陵程  
大昌雍錄云七帝七陵而稱五陵者劉良謂高惠景  
武昭五陵在北其說是也在北在渭之北  
也後世言陵邑之盛但曰五陵語順也

慎按苕溪漁隱叢話此詩及老人行皆非東  
坡所作故前集不載又云蔡天啟為王荊公  
所知東坡申王畫馬圖歌即天啟作其氣格

有類東坡世因悞收入其後姑蘇居世英家  
刊東坡前後集遂刪去云云蔡天啟名肇紹  
聖元符間官中書舍人嘗守睦州後坐元祐  
黨遭斥此詩施氏原本不載新刻本載續補  
下卷今駁正

老人行

有一老翁老無齒處處無人問年紀白髮如絲向下垂  
一雙眸子碧如水不裹頭又無履相識雖多少知己問

翁畢竟何所止笑言只在紅塵裏秋風獵獵行雲飛  
老人此意無人會目注雲歸心自知黃口小兒莫相笑  
老人舊日曾年少浪迹常如不繫舟地角天涯知自跳  
亦曾樂半夜傳籌醉朱閣美人如花弄絃索只恨尊前  
明月落亦曾憂羈旅他鄉迫暮秋故國日邊無信息斷  
鴻空逐水長流或安貧或安富或爵通侯封萬戶一任  
秋霜換鬢毛本來面目長如故水有蘋兮山有芝人意  
雖存事已非有時却憶經游處都似茫茫春夢歸邇來  
尤

解安貧賤不為公卿強陪面皎如明月在秋潭動著依  
前還不見還不見可奈何空使遠人增眷戀但祇從他  
隨物轉青樓黃閣長相見若相見莫殷勤却是翁家舊  
主人

慎按苕溪漁隱叢話云東坡集行于世者惟  
大全備成二集詩文最多真偽相半其後吳  
門居世英家刊大字前後集最為善本世傳  
前集乃東坡手自編者繆誤絕少如御史府



諸詩不欲傳之于世老人行申王畫馬歌非其所作故皆無之云云胡仔南宋人其言必非無據惟澠水燕談錄則云張芸叟使遼宿幽州館中有題子瞻老人行于壁間者芸叟題其後云誰傳佳句到幽都逢著胡兒問大蘇按此二句亦子由作乃好事者傳會也後人不察遂采題壁詩入坡集耳今駁正

又贈老謙

一本題云贈僧思誼

瀉湯舊得茶三昧  
覓句近窺詩一斑  
清夜漫漫困披覽

一作搜攪  
齋場那得許慳頑

慎按吳曾能改齋漫錄云此詩劉貢父作故  
改編于此

送公為游淮南

負米萬里緣其親  
運甓無度憂其身  
讀書莫學流麥士  
挾策莫比亡羊人  
乃翁辛苦到白首  
汝今強勉當青春  
昔時管鮑以君霸  
此兩士賈寧非貧

慎按此詩亦見雞肋集晁无咎作也前四句  
下晁自注云陶潛詩既耕亦已種時還讀我  
書即此意也今據此駁正

池上二首

小池新鑿會天雨一部鼓吹從何來有蟾正碧亂草色  
時涵出沒東南隈井幹跳梁亦足樂洞庭魚龍何有哉  
能歌德聲莫入月清池與爾俱忘回

不作太白夢日邊還同樂天賦池上池上新年有荷葉

細雨魚兒噉輕浪男兒學易不應舉幽人一友吾得尚  
此池便可當長江欲榜茅齋來蕩漾

慎按以上二首一見黃山谷集又見晁无咎  
集題云家池雨中今據此駁正

贈仲素寺丞致仕歸隱潛山

潛山隱君

一作居

七十四紺瞳綠髮方

樂城集作始

謝事腹中

靈液變丹砂江上幽居連福地彭城為我住三日明月

滿舟

樂城集作船

同一醉丹書細字口傳訣顧我沈迷真棄

耳年來四十髮蒼蒼始欲求方救憔悴他年若訪潛山  
居慎勿逃人改名字

仲素

姓王名景純  
注見十五卷

慎按先生守徐州有贈王仲素寺丞五言古  
詩一首時子由亦在徐此篇乃同時作樂城  
集原題云贈致仕王景純寺丞是年為熙寧  
丁巳子由已卯生故云年來四十髮蒼蒼其  
為子由作無疑今駁正

揚州以土物寄少游

鮮鯽經年秘

淮海集作漬

醯醢團臍紫蟹脂填腹後春尊茁

活如

淮海集作滑于

酥先社薑芽肥勝肉烏子

淮海集作鳧卵

累累何

足道點綴

淮海集作鮓釘

盤餐亦時欲淮南風俗事瓶罌方法

相傳竟留蓄

淮海集作為肯蓄

且同千里寄鵝毛何用孜孜飲

麋鹿

淮海集結處四句云魚鱗蟹醢薦籩豆山藪溪毛例蒙錄輒送行庖當擊鮮澤居備禮無麋鹿

慎按此詩亦見淮海集第六卷題云以尊薑

法魚糟蟹寄子瞻中間字句異同處淮海集

覺較勝秦高郵人篇中以土人致土貢語意  
特親切其為秦作無疑新刻載續補上卷今

駁正

再過泗上二首

眼明初見淮南樹十客相逢九吳語旅程已付夜帆風

客睡不妨背船雨黃甘紫蟹見江梅

張文潛  
集作海

紅稻白魚

飽兒女殷勤買酒謝船

張文潛  
集作殷

師千里勞君勤轉櫓

繫舟淮北雨折軸繫舟淮南風斷橋客行有期日月疾

歲事欲晚霜雪驕山根浪頭作雷吼縮手敢試舟師篙  
不用然犀照幽怪要須拔劍斬長蛟

慎按右七言律詩二首舊于張文潛宛丘集  
中曾見之今所傳張右史集獨遺此存疑附  
志以俟再考

驪山

君門如天深幾

宋文鑑  
作九

重君王如帝坐法宮人生難處

是安穩何為來此驪山中複道凌

宋文鑑  
作連

雲接金闕樓



觀隱烟橫翠空

宋文鑑  
作紅

林深霧

宋文鑑  
作谷

暗迷八駿朝東

暮西勞六龍六龍西幸峨眉棧悲風便入華清院霓裳

蕭散羽衣空麋鹿來遊猿鶴怨我上朝元春半老滿地

落花無人

宋文鑑  
作人不

掃羯鼓樓高掛夕陽長生殿古生青

草可憐吳楚兩醯雞築臺未就已堪悲長楊五柞漢幸

免江都樓城隋自迷由來留

宋文鑑  
作流

連多喪國宴安酖

毒因奢惑三風十愆古所戒不必驪山可亡國

驪山

注見第  
三卷中

華清

雍錄華清宮開元十年建初名溫  
泉宮後改名在驪山最為奢盛百

司皆有邸第明皇常以十月往幸歲竟乃歸長安志  
華清宮四面皆有繚牆內有朝元閣長生殿羯鼓樓

朝元

長安志朝元閣在華清宮東南老  
君殿之北天寶七載改名降聖閣  
羯鼓樓

雍錄  
鼓

樓在朝元閣東  
近南繚牆之外

長生殿

長安志長生殿有二其一在  
都城迎仙宮內其一在驪山

在都城者寢殿也在驪山者齋殿也  
天子有事于朝元閣即齋沐于此

慎按右七言古詩一首亦見宋文鑑第十四

卷題云驪山歌李廌作皖江陳焯宋詩選因

之考經籍志李廌有濟南集二十卷今不傳

但據宋文鑑為考證云

次韻謝子高讀淵明傳

枯木嵌空微黠淡古器雖存無古絃袖中正有南風手

誰能聽之誰為彈

一作傳

風流豈落正始後甲子不數義

熙前一山

山谷集作軒

黃菊平生事無酒令人意缺然

慎按此詩見山谷外集第二卷又中州集蔡

松年銀州道中詩云此時最憶涪翁語無酒

令人意缺然其為山谷作無疑今據此駁正

滄洲亭懷古

湘水悠悠天際來  
夾江古木抱山回  
城中人物若可數  
日晏市散多蒼苔  
九疑巉天古雲埋  
遙想帝子龍車迴  
心衰目極何可望  
九歌寂寂令人哀

慎按滄洲亭無可攷  
外集作蒼梧懷古此詩  
見沈遼雲巢集中  
宋文鑑詩選亦以為沈遼  
作今據此駁正

戲咏子舟畫兩竹兩鸚鵡

風晴日暖搖雙竹  
竹間對語雙鸚鵡  
鵡鵡之肉不可食

山谷集  
作籍

人生不才果為福子舟之筆利如錐千變萬化

皆天機未知筆下鸚鵡語何似夢中蝴蝶飛

子舟

畫繼黃彛字子舟潼川人其名與字初非彛與子舟也山谷以其尚氣故取二器以規之自後

折節文與可每自言畫竹不及子舟

筆如錐

白居易紫毫筆詩尖如錐兮利如刀

慎按右一首亦見黃山谷集子舟乃黃斌老

之弟山谷詩中題子舟畫者甚多此詩確係

山谷格律非蘇詩也今駁正

贈山谷子

黃童三尺世無雙  
筆頭衮衮懸秋江  
不憂老子難為父

平生崛強今心已

一作

降我來喜共阿戎  
語應敵縱橫如

急雨生子還如孫  
仲謀豚犬漫多何  
足數黃家小兒名

拾得

陳後山集  
作小德

眉如長松眼如漆  
只今數歲已動人老

人

後山集  
作夫

留眼看他日笑君  
老蚌生明珠自笑此物吾

家無君當置酒我當賀  
有兒傳業更何須

慎按右一首亦見陳履常後山集題云贈黃

氏子小德按先生本集已有次韻魯直嘲小

德詩二首此詩當是陳作今據後山集駁正

昭陵六馬唐文皇戰馬也琢石象之立昭陵前客  
有持此石本示予為賦之

天將剗隋亂帝遣六龍來森然風雲姿颯爽毛骨開飈

馳不及視山川

宛丘集  
作立

儼莫回長鳴視八表擾擾萬駕

駘秦王龍鳳姿魯

宛丘集  
作魚

鳥不足摧腰間大白羽中物

如風雷區區數豎子搏

茗溪漁隱  
叢話作縛

取若提孩手持掃天

帚六合如

宛丘集  
作無

塵埃艱難濟大業一一非常才維時

六驥足績與英衛陪功成鏘八鸞玉輅行天街荒涼昭陵闕古石埋蒼苔

昭陵六馬

元和郡縣志太宗昭陵因九峻山為陵在醴泉北五十里唐會要上欲闡揚先帝徽

烈乃令匠人琢石寫諸蕃君長列于陵司馬門內又刻石為常所乘破敵馬六匹于闕下長安志六駿石像在陵後趙明誠金石錄昭陵六馬贊初太宗以文德皇后之墓自為文刻石于昭陵又琢石像平生征伐所乘六馬為贊之皆歐陽詢八分書○慎按昭陵六馬圖石刻其一曰拳毛騧黃馬黑喙平劉黑闥時所乘前中六箭背中三箭其二曰什伐赤純赤色平王世充時所乘前中四箭背中一箭其三曰白蹄烏純黑色四蹄俱白平薛仁果所乘其四曰特勒驃黃白色喙微黑平宋金剛時所乘其五曰颯路紫燕騮



平東都時所乘前中一箭其六曰青騅英衛陪唐會要昭

蒼白雜色平寶建德時所乘前中五箭陵陪莖功臣岑文本房玄齡李靖李勣魏徵高士庶等按史李勣封英國公李靖封衛國公

慎按右五言古一首亦見張文潛右史集第

八卷中合之茗溪叢話及宋文鑑皆以為張耒作今據此駁正

題盧鴻一

一本無一字

學士堂圖

昔為太室游

別本作花訛

盧巖在東麓直上登封壇一夜繭

生足徑歸不復往巒壑空在目安知有十志

別本作千老大謬

舒卷不盈幅

一本作軸與結句韻重訛

一處一盧生裘葛蔭喬木方

為世外人行止何煩錄百年入篋笥犬馬同一束嗟余

縛世累歸未

樂城集作來

有苑屋江干百畝田清泉映修竹

尚欲逃世名豈須

樂城集作復

上圖軸

盧鴻一

舊唐書隱逸傳盧鴻一隱于嵩山開元六年徵至東都謁見不拜授諫議大夫固辭放還

山賜草堂一所困學紀聞云唐舊史鴻一蓋二名與中岳劉真人所書合新史刪去一字不知何據當以

舊史

學士堂圖

周密雲烟過眼錄楊彥德家所藏盧鴻一草堂圖一卷乃是數百年物李

伯時曾臨一本曾自書卷中歌一篇云甘泉建章空草莽甲第紛紛誰復數嵩岳徵君一草堂却有畫圖

傳萬古巖巒與勝帶烟霞曠望幽盟空處所微茫短  
幅幾臨模便覽市朝如糞土輞川別業王維畫君陽  
山記希聲叙胡將冰雪污囂塵規模難勝非十志李  
吾侶次則少游仲殊參寥繼之皆一時聞人十志參  
云玄居十志者謂草堂樾館玄室翠庭期仙滌煩錦  
淙碧潭倒影桃烟十者天地之成數志者記述之總  
名皆圖中之景也十志今存其八而遺草堂樾  
館二紙云云新刻本十志訛作千老殊不可解

慎按此詩亦見欒城集第十五卷中題云廬

鴻草堂圖蓋子由曾試舉人洛下有登嵩山

諸什故起句云然東坡未嘗游太室也今駁

正

李白謫仙詩

我居青空裏君隱黃埃中聲形不相弔心事難形容欲  
乘明月光訪君開素懷天盃飲清露展翼登蓬萊佳人  
持玉尺度君多少才玉尺不可盡君才無時休對面一  
笑語共躡金鰲頭絳宮樓闕百千仞霞衣誰與雲烟浮  
慎按東觀餘論云我居空青裏君處紅埃中  
仙人持玉尺度君多少才玉尺不可盡君才  
無時休此上清寶典李太白詩也云云黃伯

長但摘此六句而不載全篇檢太白集乃無  
此詩今據東觀餘論改編此卷

飲酒四首

我觀人間世無如醉中真虛空為銷殞況乃百憂身惜  
哉知此晚坐令華髮新聖人驟難得日

淮海集  
作得

且致賢

人

左手持

淮海集  
作執

蟹螯舉觴屬雲漢天生此神物為我洗

憂患山川同恍惚魚鳥共蕭散客至壺自傾欲去不得

間

有客遠

淮海集  
作南

方來酌我一盃茗我醉方不啜強啜忽

復醒既鑿渾沌氏

淮海集  
一作竅

遂遠

淮海集  
作出

華胥境操戈逐

儒生舉觴還酹酊

雷觴淡於

淮海集  
作如

水經年不濡唇爰有擾龍齋為造英

靈春英靈韻甚

淮海集  
作何

高蒲萄難與

淮海集  
作為

隣他年血

食汝當

淮海集  
作應

配杜康神

英靈春

名勝志雷州海康縣城北五里有英靈岡雷種陳氏世居于此按英靈春酒名當以此必

有劉姓者善釀故云爰有擾龍氏為造英靈春  
少游謫居此地年餘故有經年不濡唇之句

慎按以上四首亦秦少游謫雷州時詩載淮  
海集第四卷中今據此駁正

游山呈通判承議寫寄參寥師

煌煌世胄餘夫子非碌碌由來有詩書所以能絕俗得  
官本河朔瓜期未易促扁舟下南來逸駕追鳴鵠遇勝  
即徜徉風餐兼露宿嗟余偶傾蓋一笑外羈束杖策每  
過從相攜訪山谷東風披鮮雲繡錯出林麓松門有時

盡幽景無斷續崖轉聞鐘聲林疎見華屋銜山餘落景  
歸迹猶躑躅誰云鄴下歡往事不可復吾曹二三子取  
樂亦云足願公寄新詩一一能見錄船頭行北歸囊橐  
有美玉塵埃京洛人亦與洗心目

慎按右一首亦見參寥子集題云與曾仲錫  
通判同游天竺諸山以先生集考之在定州  
時曾為通判有次韻曾仲錫承議荔支詩又  
有送仲錫通判如京師詩今觀是詩云得官



本河朔瓜期未易促扁舟下南來逸駕追鳴  
鵲意仲錫自離定州未到京師過杭與參寥  
子游計東坡先生時已貶嶺南矣此詩斷非  
先生作今據參寥集為駁正

轆轤歌

新繫青絲百尺繩心在君家轆轤上我心皎潔君不知  
轆轤一轉一惆悵何處春風吹曉幕江南綠水通珠閣  
美人二八顏如花泣向花前畏花落臨春風聽春鳥別

時多見時少愁人一夜不得眠瑤井玉繩相對曉

慎按唐顧況集有悲歌四首新繫青絲百尺  
繩四句其第三首也何處春風吹曉幕四句  
其第四首也惟臨春風以下六句未詳作者  
姓名要非東坡先生詩也今據此駁正

白鶴吟留鍾山覺海

白鶴聲可憐紅鶴聲可惡白鶴招不來紅鶴揮不去長  
松受穢死乃以紅鶴故北山道人曰美者自美吾何為

而喜惡者自惡吾何為而怒去自去耳吾何駛

半山集作闕

而追來自來耳吾何妨而拒吾豈厭喧而求靜吾豈好

丹而非素汝謂松死吾無依焉

半山集作耶

吾方捨陰而坐

露

慎按右一首見王半山集第二卷中題云白

鶴吟示鍾山覺海元老首二句下尚有白鶴

靜無匹紅鶴喧無數二句不知何以脫落又

復訛入先生集今駁正

次韻張甥棠美述志

名宗興

仲子甘心織屨避萬鍾淵明不肯折腰為五斗一年鴻

雁識來往終日沐猴誰去取知甥詩意慕兩君

雞肋集作甥詩

意慕兩君間

讀書要在存心久平生所談性命與長棄不憂

金石朽我今已習鶩子定猶復晨朝怖頭走割心先擬

射聲

別本作殺

名不作羊鄒悲

雞肋集作悽

峴首雲梯雨矢集無

方我已中

雞肋集作心

灰同墨守恐甥自是禹門鱗未可潛

逃入吾數琢磨晚覺孟光賢畏我放言時被肘甥能耜

我青門瓜正午時來休老手

正午時來

按傳燈錄龐居士有女曰靈照居士將入滅謂靈照曰視日早晚正午時來報照遽

報日已中矣而有蝕也士出戶觀女即登父坐合掌坐化後七日士亦化龐婆走田中謂子龐大曰汝父死矣龐大笑曰嗟倚耒亦脫去詩中正用此事補注繆引晉書石勒與李陽事無關涉

慎按右一首亦見晁无咎鷄肋集題中無張

錫二字今據此駁正

蘇詩補註卷四十九

欽定四庫全書

蘇詩補註卷五十

翰林院編修查慎行撰

古今體詩四十三首

觀開西湖次吳左丞韻

偉人謀議不求多事定紛紛自唯阿盡放龜魚還綠淨  
肯容蕭葦障前坡一朝美事誰能紀百尺蒼崖尚可磨  
天上列星當亦喜月明時下浴明

疑當作清波

慎按右一首見參寥子集題云次韻吳承老

推官觀開西湖又按潛說友咸淳臨安志載

此詩于西湖條下亦以為道潛作細玩詩中

多稱頌之辭斷非東坡先生作今據此駁正

戲題巫山縣用杜子美韻

按杜集巫山題壁詩所云卧病巴東久今年強

作歸即此韻也

巴俗深留客

瀛奎律髓作巴俗雖親我

吳儂但

瀛奎律髓作暫

憶歸直知難

共語不是故相違東縣聞銅臭江陵換袂衣丁寧巫峽

雨慎莫暗朝暉



東縣銅臭

任淵山谷集注舊見山谷跋云銅臭乃昌黎照壁喜見蝎之意蓋過巫山用銅錢也

按巫山江上有二石俗謂之銅錢鐵錢堆荆夔自此分界瀛奎律髓亦云蜀人用鐵錢過巫山縣始用銅錢

慎按方回瀛奎律髓云山谷以紹聖二年謫

黔州元符戊寅移戎州庚辰正月徽宗登極

離戎州明年辛巳至峽州蓋流離跋涉八年

矣未嘗有一詩及于遷謫此出峽詩起句石

刻作巴俗雖親我吳儂暫憶歸細玩則改本

為佳任淵山谷詩注云篇中有江陵換袂衣  
之句山谷度自巫山至此已初夏矣云云此  
詩載山谷詩集第十卷中今據以上諸說為  
駁正

答晁以道索書

閱世真難記如公自不忘其於書太簡正以懶相妨

晁以道

宋史晁說之字以道自號景迂子補之從弟  
舉進士又舉博學宏詞科有文集五十卷名

嵩山

集

慎按右五言四句見陳後山集寄晁以道五  
言律詩之前半首也其後四句云與有還家  
樂終無却老方莫須憂潦倒未許細商量今  
據此駁正

陳伯比和回字復次韻

百里馮生寧屑去湖海陳侯猶肯來詩書好在家四壁  
蒲柳翦然城一隈騎上下山亦疎矣儵從容出何為哉  
市橋十步即塵土晚雨瀟瀟殊未回

陳伯比

名琦初字元老後改伯比  
晁補之有陳琦伯比字說

慎按晁補之雞肋集有家池雨中二首又次  
韻陳伯比二首此其第一首也晁集中與伯  
比往還詩牘甚多此首與上卷池上二首格  
調自別斷非東坡作今駁正

與道源游西莊遇齊道人同往草堂為齊書此

桑麻

半山集  
作楊

已零落藻荇復消沈園宅在人境歲時傷

我心強穿南塋路遙

半山集  
作共

望北山岑欲與

半山集  
作覓

道

人語跨鞍聊一尋

道源

姓沈失其名與王介甫在金陵往還游好甚密

慎按右五言律一首見王半山集題云元豐四年十月二十四日與道源過西莊遂游寶乘寺二首此其第一首也中間三字不同齊道人西莊草堂俱失攷今據王集駁正

答子勉三首

君不登郎省還應上諫坡才高殊未識歲晚喜無他櫪

馬羸難出隣雞凍不歌寒爐餘幾火灰裏撥陰何

子勉

瀛奎律髓云高荷字子勉江陵人以五言律三十韻贊見山谷山谷賞之遂知名後知某州卒

詩入江西派所著名適適集石林詩話云高子勉荆南人學杜詩頗得句法晚為童貫客得蘭州通判既不為時論所與其詩亦不傳雪浪齋日記載其詩有沙軟綠頭相並鴨水深紅尾自跳魚之句亦殊有思致郎省  
唐書百官志隋尚書省諸司郎及承務郎各一人武德二年改諸司郎為郎中承務郎為員外郎宋史職官志門下省有起居郎掌記天子言動與起居舍人對立于殿下螭首之側謂之左右史  
**諫坡**  
雍錄今世通呼諫議為諫坡蓋起于因詒錄上坡下坡之說坡者舍元殿前龍尾道坡陀而高者也唐制兩省供奉常在入主左右侍奉宣傳故每御殿則宰相與兩省官於未索扇之前立欄楯之內

及扇開便侍立于香案之前取其先上而備供奉其立班所以皆在坡上也上坡下坡即以立班高下為言

驚人得佳句或以傲王公處士

山谷集作世

還

山谷集作要

清節

滑稽安足雄深沈似康樂簡遠到安豐一點無俗氣相

期林下風

山谷集作同

安豐

晉書王戎封安豐侯善發談端賞其要會

慎按黃山谷集有次韻答高子勉五言律詩

凡十首君不居郎省云云其第四首驚人得

佳句云云其第六首也今據此駁正

歐倩

黃集作規

腰支柳一渦

一本作欲舞腰支柳一窠

小梅催拍大梅歌

舞餘片片

能改齋漫錄作細點

梨花落

能改齋漫錄作雨

爭奈

黃集作奈此

當

塗風物

能改齋漫錄作月

何

歐梅

李端叔跋山谷二詞後云魯直自放廢中請當塗一年方到官既七日而罷其章句所留不多

所謂歐與梅者皆當塗官妓也史容山谷詩注亦云大小梅皆太平州官妓

當塗

山谷年譜建中

靖國元年自戎州放還辭免吏部員外郎乞知太平州崇寧元年壬午領州事到官九日而罷按當塗縣

晉成帝時始置

宋屬太平州



慎按右七言絕亦見黃山谷集太平州二絕句之一也吳曾能改齋漫錄云豫章得請守當塗七日而罷又數日乃去其詩云歐倩腰支柳一渦云云又有木蘭花詞結句云歐舞梅歌君更酌自批云歐梅當時二妓也據此則此詩為山谷作無疑今援證改編

和子由次王鞏韻如囊之句可為一噓

平生未省為人忙貧賤安閒氣味長粗免趨時頭似葆

稍能忍事腹如囊簡書見迫身今老尊酒聞呼首一昂

欲挹

欒城集  
作挽

天河聊自洗塵埃滿面鬢眉黃

慎按右一首亦見欒城集第八卷中題云次  
韻王鞏自咏乃客徐州時與定國唱和之作  
今據此駁正

元祐癸酉八月二十七日於建隆章淨館書贈王  
觀

海上東風犯雪來臘前先折鏡湖梅遙思禁苑青春夜

坐待宮人畫詔回

建隆

汴宮遺跡志太清觀在大梁門外西北周世宗所建宋太祖以建隆改元遂更名曰建隆觀

慎按右七言絕句一首見會昌一品集中乃李文饒懷京國詩也萬首唐人絕句載此詩亦以為李德裕作題中明云書贈王觀則此非東坡詩可知今駁正

東園

岑寂東園可散愁  
膠膠擾擾夢神州

山谷集  
作游

萬竿苦竹

旌旗卷一部鳴蛙鼓吹收

山谷集作休

雨後月前天欲冷身

閒心遠地偏

山谷集作常

幽杜門謝客恐生謗且作人間鵬

鷄游

慎按右七言律一首見黃山谷詩集第十卷

中次韻黃斌老晚游池亭二首之一也山谷

與斌老唱和甚多集中又有答斌老獨游東

園五言古詩六首東園必斌老所居山谷嘗

從之游者也今駁正

藏春塢

朱閣前頭露井多碧桃

一作梧桐

花下美人過寒泉未必能

勝此奈有銀餅

一作牀

素綆何

慎按此詩亦見陸龜蒙集題云野井又見淮

海集今駁正

次韻參寥寄少游

巖棲木石已皤然交舊何人慰眼前素與畫公心印合  
每思秦子意珠圓當年步月來幽谷拄杖穿雲冒夕烟

臺閣山林本無異故應文字不離禪

畫公

高僧傳皎然名畫湖州人有逸才然恥以文章名世將入杼山泉所著詩文火之後人為之稱

曰雪之畫能清秀

步月來幽谷

淮海集龍井題名記云元豐二年中秋後一日余自吳興

過杭龍井辨才法師以書邀余入山比出郭日已夕航湖至普寧過參寥是夕天宇開霽林間月明可數毛髮遂從參寥杖策並湖而行出雷峯度南屏入靈石塢得支徑上風篁嶺行二鼓始至壽聖院謁辨才于潮音堂云云詩中當年步月來幽谷拄杖穿雲冒夕烟二句正與題名相合

慎按右七言律一首乃辨才法師詩本集先

生自書此詩而題其後云辨才作詩時年八

十二矣平生初不學作詩如風吹水自成文理若參寥與吾輩詩乃如巧人織錦耳又按潛說友咸淳臨安志載辨才此詩於龍井條下附見少游參寥和詩淮海集詩題云辨才師以詩見寄繼聞示寂追次其韻云云即此首韻則又其一証也今駁正

贈仲勉子文

雨昏南浦曾相對雪滿荊州喜再逢有子才如不羈馬

知君心似後彫松閒看書冊應多味老傍人門想更慵

何日晴軒觀

山谷集作觀

筆硯一杯相屬更從容

南浦

注詳本卷後萬州下

慎按右一首亦見山谷集題云和高仲本喜

相見按仲本名宿山谷過萬州高為太守有

與萬州太守高宿游岑公洞夜雨連明絕句

亦訛入東坡集中萬州唐為南浦郡與此詩

起句正合其為黃作無疑今據此駁正



講武臺南有感

山城九月冒朝寒

山谷集作月明猶在搭衣竿

講武

山谷集作曉踏

臺南路

屈盤騶子雨中乘馬去村童烟外倚牆看鴉啼冢

山谷集作

宰

木秋風急鷺立漁船夜

山谷集作野

水乾花似去年堪折

贈插花人去淚闌干

講武臺

元和郡縣志晉陽有講武臺在縣北十五里顯慶五年置宋史太宗紀興平二年九月幸

講武臺大閱未知孰是

淚闌干

漢書息夫躬絕命詞涕泗流兮崔闌臣瓚注云崔闌謂涕泗闌

也干

慎按右七言律一首亦見黃山谷集中間不同者十一字今據此考正

移合浦郭功甫見寄

君恩浩蕩似陽春合浦何如在海濱莫趁明珠

用學紀聞作莫

向沙弄明月夜深無數采珠人

采珠

南越志珠母海在合浦縣南中有七珠池珠有九品大者名璫珠次走珠又次滑珠又次礪硤

珠又次官兩珠又次稅珠又次公符珠菽園雜記蜃人采珠者以大船環池以石懸大絙別以小繩繫諸蜃腰沒水拾蚌置竹籃中振繩則舶人汲取緣絙上不幸遇惡魚有一綫之血浮水面則羹魚腹中矣

慎按王應麟困學紀聞云東坡文章好譏刺  
文與可戒以詩云北客若來休問事西湖雖  
好莫吟詩晚年郭功甫寄詩云莫向沙邊弄  
明月夜深無數采珠人云云據此則此詩乃  
郭功甫作今駁正

題懷素草帖

人人送酒不曾沽終日松間掛一壺草聖無

石刻作欲

成狂

飲

石刻作便

發真堪畫作醉僧圖

醉僧圖

宣和書譜御府藏懷素草書帖一百餘種內有醉僧圖詩又劉餗隋唐佳話張僧繇作醉

僧圖道士每以此嘲僧羣僧賀閻立本作醉道士圖今並傳。按卞氏式古堂書畫彙攷云李龍眠醉僧圖卷老泉書懷素詩人人送酒不曾沽云云併倣其草法

慎按石刻先生自題云此懷素詩也僕好臨之人間當有數百本也後人不加深考遂訛以此詩編入集中耳又按萬首唐人絕句載此詩亦以為懷素作今據此駁

僕年三十九在潤州道上過除夜作此詩又二十

年在惠州追錄之以付過二首

寺官官小未朝參紅日半窗春睡酣為報隣雞莫驚覺  
更容殘夢到江南

寺官

宋史職官志太常宗正光祿衛尉太僕大理鴻臚司農太府共九寺正卿少卿而下太常則有

協律郎奉禮郎太祝大理則有司直評事其七寺丞皆七品主簿皆八品統名寺官

釣艇歸時菖葉雨綠車鳴處楝花風長江昔日經游地  
盡在如今夢寐中

慎按何遜春渚紀聞云錢唐關氏詩律精深

妍妙世守家法子東二兄子容子開皆稱作  
者寺官官小未朝參釣艇歸時菖葉雨云云  
二首此皆子容詩世傳以為東坡先生作非  
也今以年譜攷之熙寧七年甲寅先生年三  
十九是冬自杭倅移知密州在密度歲有除  
夜答段屯田詩起句云龍鍾三十九勞生已  
強半何曾在潤州過除夜耶向疑此二絕句  
非先生作不謂古人有先我言之者矣今據

此駁正

萬州太守高公宿約游岑公洞而夜雨連明戲贈

二小詩

肩輿欲到岑公洞正怯衝泥傍險行定是岑公閱清境  
春江一夜雨連明

萬州

輿地廣記萬州秦漢屬巴郡後周立安鄉南都二郡後改安鄉曰萬州唐立浦州天寶中為南

浦郡

太平寰宇記山南東道萬州舊胸臆縣地後為安鄉及萬川郡貞觀八年改為萬州

岑公洞

名勝志萬縣西山有岑公洞在大江之南廣六十餘丈深四十餘丈圖經云岑公名道願江陵人隋末隱

此唐封沖妙大師虛鑒真人輿地碑目萬州石刻有  
岑公洞記元和八年段文昌撰又有黃魯直題名在

岑公洞

下巖寺

蓬窗高枕雨如繩恰似糟牀壓酒聲今日岑公不能飲

吾儕猶

山谷集  
作聞

健可頻傾

慎按右二首見黃山谷集題云萬州太守高

仲本宿約游岑公洞而夜雨連明戲作按山

谷年譜建中靖國辛巳自戎州赦還三月至

峽州作萬州太守高仲本約游岑公洞詩同



時又有萬州下巖二首任淵注云山谷有磨  
崖題石載高仲本置酒事年月歷歷可攷其  
為黃作無疑今據此駁正

送柳宜歸

折脚鐺邊

山谷集  
作中

煨淡粥曲枝

山谷集  
作腰

桑下飲離盃書

生

山谷集  
作知君

不是南遷客魑魅驚人

山谷集  
作無情

須早回

慎按右一首見黃山谷外集題云長沙留別

青神史容注云崇寧二年十一月山谷以荆

南所作承天塢記謫宜州自潭州歷衡永全州靜江以趨貶所作長沙留別詩云云柳宜歸無可攷今據山谷詩注為駁正

謝都事惠米

平生忍慾今忍貧閉口逢人不少陳俸薄身輕趙都事也能作意向詩人

慎按右一首亦見陳後山集第三句作俸薄身清趙都史今據此駁正

次韻送張山人歸彭城

美君飄蕩一虛舟來作錢塘十日游  
水洗禪心都眼淨山供詩筆總眉愁  
雪中乘興真聊爾春盡思歸却罷休  
何日五湖從范蠡種魚萬尾橘千頭

張山人

即張天驥自號雲龍山人注見前

慎按右一首施氏原注載先生守杭卷中按  
阮閱休詩話總龜云徐州張天驥不遠千里  
見朱定國于錢唐愛其風物欲徙家居焉春

盡思歸定國以詩戲之云云起句羨公飄蕩  
一孤舟第七句何事却尋朱處士與集本小  
異朱定國無可攷又按本集有行宿泗間見  
徐州張天驥次舊韻七律一首見後三十五  
卷中即此首韻也阮閱休以為朱定國作當  
必有據今移編此卷俟再攷

絕句三首

松柏蕭森溪水南道人只

淮海集  
作為

作兩團

淮海集  
作小團

菴市

區收罷豚魚稅來與彌陀共一龕

水南

淮海集題云處州水南巷即其地也

此身分付一蒲團靜對蕭蕭竹

淮海集作玉

數竿偶為老僧

煎茗踞自攜修綆汲清泉

慎按以上二首見淮海集第十一卷中蓋少

游于紹聖初坐黨籍由國史編修官出通判

杭州御史劉拯復論其增損神宗實錄貶監

處州酒稅使者承望風指伺候過失不可得

以謁告寫佛書為罪削秩徙郴州此二首正  
貶處州時作故有市區收稅一龕蒲團之句  
今據此為駁正

天風吹月入欄干烏鵲無聲夜向

淮海集  
作子夜

闌織女明星

來枕上乃

淮海集  
作了

知身不在人間

慎按右一首亦見淮海集第十一卷中題云  
四時四首贈道流此其第二首也趙德麟侯  
鯖錄亦以天風吹月入闌干云云乃秦少游

遊仙詞四首之一今據此駁正

睡起

柿葉滿

山谷集作鋪

庭紅顆秋薰爐沈水度春

山谷集作衣

篝松

風夢與故人遇自

山谷集作同

駕飛鴻跨九州

駕飛鴻

郭璞游仙詩赤松臨上游駕鴻乘紫烟李白詩不及廣成子垂雲駕輕鴻

慎按右一首亦見黃山谷外集第九卷中今

據此駁正

秋思寄子由

黃葉

山谷集  
作落

山川知晚秋小蟲催女獻功裘老松閱世

卧雲壑挽著蒼

山谷集  
作滄

江無萬牛

獻功裘

周禮司裘季秋獻功裘以待  
頒賜注云功裘卿大夫所服

慎按右一首亦見黃山谷內集第一卷中今

駁正

侯灘

江邊

雲巢集  
作流

皎皎

雲巢集  
作激激

過侯灘更上山腰

雲巢集  
作頭

看

打

外集  
作打

盤百歲老兒

雲巢集  
作人

親擊鼓城中憂患

雲巢集  
作樂



不相干

侯灘

水經漢水又東逕猴灘注云山多猿猴乘危噉飲故灘受茲名按侯疑當作猴

慎按右一首見沈遼雲巢集按遼字濬達集

中有贈別子瞻詩兩公同時游好故沈詩訛

入公集今駁正

火星巖

火星巖下石凌壁

雲巢集作峻嶒

閣上相忘

雲巢集作殿閣相望

止一僧

莫問人間興廢事門前流水几前燈

火星巖

宋盧藏永州三巖記永之東南三巖相望火星巖亂石怪聳後瞰山腹往時有黃冠師宅

其側塑火星像

為人祈福因名

慎按右一首亦見沈遼雲巢集今駁正

謝惠貓兒頭筍

長沙一日

山谷集作月

煨籩

山谷集作鞭

筍鸚鵡洲前人未知走

送煩公助湯餅貓頭突兀鼠

山谷集作想

穿籬

貓頭

韓子蒼陵陽集云湖南有大竹世號貓頭任淵陳後山詩注云潭州有貓兒頭筍

慎按右一首見黃山谷集第十一卷中與本

詩不同凡三字覺黃集較勝今據此改正

題淨因堂

暝倚蒲團卧

山谷集  
作挂

鉢囊半牕疎箔度微涼蕉心不展

待時雨葵葉為誰傾夕陽

挂鉢囊

傳燈錄雲門曰高  
挂鉢囊拗折挂枝

慎按右七言絕句見山谷內集題淨因壁二

首之一也第一句卧鉢囊一本又作畫夢長

今據此考正

題淨因院

門外黃塵不見山

山谷集作此

中草木亦常閒履聲如渡

薄冰過催粥華鯨吼夜闌

慎按右一首合前一首乃山谷題淨因壁二

絕句也新刻本分作二處今據黃集駁正

同景文咏蓮塘

塘上鈎簾對晚香不知斜

山谷集作半斜紅

日已侵牀江妃自

惜

山谷集作羞出

凌波步

一作機

長在高荷扇影涼

慎按右一首亦見黃山谷外集十六卷中今

駁正

竹枝詞

自過鬼門關外天命同人鮓甕頭船北人墮淚南人笑

青嶂無梯聞

一本作問訛

杜鵑

鬼門關

輿地廣記容州北流縣有句扇山在縣南三十里兩石相對口濶三十步俗號鬼門關

人鮓甕

名勝志人鮓甕在巫峽下蜀江最險處

慎按右一首一見黃山谷集再見秦少游集

第一句自過二字黃作日瘦秦作身在第二  
句同字秦作輕第三句墮淚二字秦作慟哭  
第四句青嶂無梯四字秦作日落荒村今據  
二集駁正

寄歐叔弼

昔奠衣冠今在否近來消息不須疑曾聞圯上逢黃石  
久矣留侯不見欺

歐叔弼

名渠六一居士  
第三子注見前

慎按右四句乃藥城集中贈蔡州壺公觀劉  
道士七言律詩後半首也今據子由集全錄  
于左詩引云元祐八年七月曹煥至自安陸  
為予言過淮西入壺公觀觀懸壺之木老死  
久矣環生孫蘖無數聞有老道士劉道淵年  
八十七非凡人也謁之神氣甚清服細布單  
衣縫補殆遍煥問其意道淵悵然曰此故淮  
西守歐陽永叔所贈也世人稱永叔工文詞

善辨論忠信篤學而已君知是人竟何從來  
耶我與公有夙契且齊年也昔將去吾州留  
此以別吾服之三十年嘗破而補之矣未嘗  
垢而浣也比嘗得其訊吾亦去此不久矣煥  
聞之愕然莫測徐問其故皆不答予少與兄  
子瞻皆從公游究觀平生固嘗疑公神仙中  
人非世俗之士也公亦嘗自言昔與謝希深  
尹師魯梅舜俞數人同游嵩高見蘄書大字



於蒼崖絕澗之上曰神清之洞問同游者惟  
師魯見之以此亦頗自疑本世外人今聞道  
淵言與曩意合因作詩以示公子棐叔弼其  
詩曰思穎求歸今幾時布衣猶在老劉師龍  
章舊有世人識蟬蛻惟應野老知昔葬衣冠  
今在否近傳音問不須疑曾聞圯上逢黃石  
久矣留侯不見欺云云此事本末如此今截  
去序文及前半首令人讀之茫然不解所謂

此種繆謠向來注家刻本從未有勘正者至  
余始發之覽者亦可識其苦心矣

和黃龍清老三首

萬山不隔中秋月一鴈能傳寄遠書  
深密伽佗枯戰筆  
真誠相見問何如

黃龍

名勝志黃龍山在寧州西一百八十里上有黃龍崇恩院唐乾寧中晦機禪師得法于玄泉彦

嘗遇神僧謂曰此去東北遇洪即止

清老

慎按五燈會元同時

逢龍可住後注黃龍山禪侶雲集  
黃龍有二清皆晦堂法嗣一為靈源惟清一為草堂  
善清釋氏稽古畧云元祐六年黃山谷丁家艱館黃

龍山從晦堂禪師祖心游與草堂惟清尤篤方深密

外契

云云草堂乃善清非惟清也稽古畧訛

伽陀

稽古畧云秘密教者西天此土流傳凡七世由慧朗而下厥嗣漸微又云修伽陀譯言好去又

名修伽度此云善逝第一上升永不復還故名善逝

風前橄欖星宿落月

山谷集作日

下枕柳羽扇開靜

山谷集作照

默堂中有相憶清江

山谷集作秋

或遣化人來

騎驢覓驢真

山谷集作但

可笑以

山谷集作非

馬喻馬亦成癡一

天月色為誰好二老風流各

山谷集作只

自知

慎按右三首見黃山谷集第十一卷末以釋

氏稽古畧考之確是山谷作今據此駁正

過土山寨

南風日日縱篙撐時喜北風將我行湯餅一杯銀線亂

萋萋如

山谷集作數

飭玉簪橫

土山寨

南宋人陳克東南防守利便云土山寨在上元縣東南三十里周圍四里高二丈石季

龍將寇海道蔡謨所統七千人東至土山西至江乘鎮守八所城壘凡十一又名勝志云近半山寺康樂坊太傅土山在焉史云謝安隱會稽東山因築此擬之無嵒石故曰土山二說未詳孰是

慎按右一首亦見山谷集十一卷中今駁正

跋姜君

一本作公記

弼課冊

公自注姜君瓊州人已卯閏九月來從學于東坡至

儋耳庚辰三

月方還瓊

雲興天際歛若車蓋凝臚未瞬瀰漫憲霽驚雷出火喬

木糜碎殷地熱空萬夫皆廢雷綆四墜

一本作懸溜綆縋

日中

見昧

一作沫

移晷而收野無完塊

姜弼

字唐佐見本集

詩話總龜李德裕文章論云文章當如千兵萬馬風  
恬雨霽寂無人聲黃夢升題兄子庠之文云子之文  
章電激雷震雨電忽止間然泯滅歐陽公祭蘇子美  
文云風雲變化雨電交加忽然揮斤霹靂轟車須臾

霽止而四顧山川草木開發萌芽東坡  
題姜君弼課冊云云亦同此一機括也

慎按葛立方韻語陽秋云瓊州進士姜唐佐  
東坡極愛之贈以詩曰滄海何曾斷地脉白  
袍端合破天荒且告之曰子異日登科當為  
子成此篇及唐佐預廣州計偕過汝陽見子  
由時東坡已下世矣子由因足成其篇云生  
長茅間有異方風流稷下古諸姜適從瓊管  
魚龍窟秀出羊城翰墨場滄海何曾斷地脉

白袍端合破天荒錦衣他日千人看始信東  
坡眼力長唐佐是年省闈不利有負錦囊之  
祝矣東坡又嘗書唐佐課冊雲興天際歛若  
車蓋云云今亦刻集中乃戲書劉夢得楚望  
賦中語按楚望賦全篇載文苑英華第一百  
二十七卷中今據此駁正

惠崇蘆雁

惠崇烟雨蘆

山谷集  
作歸

雁坐我瀟湘洞庭欲買

山谷集  
作喚

扁

舟歸去故人云

山谷集  
作言

是丹青

惠崇

圖繪寶鑑建陽僧惠崇工畫鵝雁尤工小景  
善為寒汀遠渚瀟灑虛曠之象人所難到也

慎按右六言絕句亦見黃山谷集題鄭防禦

畫夾五首之一也入宋文鑑第二十六卷選

詩中亦以為黃作今據此駁正


過嶺寄子由

第二首詩載  
四十四卷中

慎按欒城集山林瘴霧老難堪七律一首乃

子由次韻子瞻過嶺詩韻也注見前





蘇詩補註卷五十